

摘藻堂四庫全書薈要

經部

欽定四庫全書薈要

經部

欽定書經傳說彙纂卷十八

詳校官祭酒臣韋謙恒



欽定四庫全書蒼要卷七百九十三

經部

欽定書經傳說彙纂卷十八

立政

集傳吳氏曰此書戒成王以任用賢才之道而  
其有意則又上戒成王專擇百官有司之長如  
所謂常伯常任準人等云者蓋古者外之諸侯  
一卿已命於君內之卿大夫則亦自擇其屬如  
周公以蔡仲為卿士伯冏謹簡乃僚之類其長



既賢則其所舉用無不賢者矣葛氏曰誥體也

今文古文皆有

集說

程子曰周公作立政之書舉言常伯至於綴衣虎賁以知恤茲者鮮一篇之中丁寧

重復惟在此一事而已又曰僕臣正厥后克正又曰后德維臣又曰侍御僕從罔非正人以旦夕承弼厥辟出入起居罔有不欽是古人之意人主跬步不可離正人也蓋所以涵養氣質薰陶德性故能習與智長化與心成也○林氏之奇曰成王繼統周公為師召公為保二公在王之左右而為賢才之主於內則天下之賢莫不因之以進想夫朝廷之上小大前後莫匪正人端士也而此篇猶以用人為戒者蓋成王既聽政以躬攬萬幾之務則一進一退而邪正兩途

自此而分此周公所以諄諄以用人為戒也○  
呂氏祖謙曰無逸立政二篇相為經緯以無逸  
之心明立政之體君道備矣自立政後周公不  
復有書納忠于王此絕筆也為治體統固臻其  
極而反覆申重之意忠愛惇篤之誠深長遠大  
之慮學者當於言外體之○陳氏櫟曰此篇以  
用三宅為立政用人之綱領立政二字每段多  
提掇之故以名篇孟子曰人不足與適也政不  
足與間也唯大人為能格君心之非無逸周公  
格心之書也立政公言用人為政之書也忠愛  
拳拳體  
用備矣

周公若曰拜手稽首告嗣天子王矣用咸戒于王曰王  
左右常伯常任準人綴衣虎賁周公曰嗚呼休茲知恤

鮮哉

集傳此篇周公所作而記之者周史也故稱若曰言  
周公帥羣臣進戒於王贊之曰拜手稽首告嗣天子  
王矣羣臣用皆進戒曰王左右之臣有牧民之長曰  
常伯有任事之公卿曰常任有守法之有司曰準人  
三事之外掌服器者曰綴衣執射御者曰虎賁皆任  
用之所當謹者周公於是歎息言曰美矣此官然知  
憂恤者鮮矣言五等官職之美而知憂其得人者少

也吳氏曰綴衣虎賁近臣之長也葛氏曰綴衣周禮

司服之類

陳氏師凱曰天官有司裘有內司服有縫人春官亦有司服

虎賁周禮

之虎賁氏也

陳氏師凱曰夏官虎賁氏掌先後王而趨舍則守王閑在國則守王宮有大故

則守王門又有旅賁氏執戈盾夾王車而趨

集說

孔氏穎達曰周公既拜手稽首而後發言還自

致敬以告王也召誥云拜手稽首旅王若公亦是召公自言已拜手稽首與此同也○林氏之奇曰下文所謂定乃事即此常任也定乃牧即此常伯也定乃準即此準人也此以為伯而下文以為牧則以伯為牧民之長宜矣伯既牧民之長而曰左右者蓋以牧伯而兼公卿也夫常伯常任準人所以與天子圖回

萬幾者固不可以不得人然其朝見也有時至於綴衣虎賁朝夕與王處苟非其人則王德以之而蠹雖外得其人何補焉○知人則括舉陶以為惟帝其難之常伯以下周公以為知恤鮮哉乃知人主之職事其所謂難者莫難于此也○呂氏祖謙曰常伯等即三宅三代之書他無所見意者公卿輔相之別名與官有別名如相曰阿衡保衡三卿曰圻父農父宏父此亦三代輔政大臣別名耳綴衣虎賁特於侍御僕從中錯舉二者以見其餘耳職重者有安危之寄職親者有習染之移其繫天下之本一也此數職先言休茲而繼以知恤必知建官之美意然後深以為恤也三宅左右大臣綴衣虎賁左右小臣職有大小而經綸康濟薰陶涵養賴焉知其美而加之憂庶不以非人處之矣○陳氏雅言曰周公言立政之道以得人為本是以統率羣臣將有言于王而先贊之以拜手稽首以竭其事君之禮復稱嗣天子王以尊其為



君之名所以開其進言之端也。○孫氏繼有曰：君道無不當謹，而惟用人為要；用人無不當謹，而惟左右為要。常伯常任，準人此以議政，而在左右者三事之外，虎賁綴衣此又以供役，而在左右者侍御固不得與三宅等，其在王左右一也。故羣臣並舉而言之。

古之人迪惟有夏，乃有室大競，籲俊尊上帝，迪知忱恂于九德之行，乃敢告教厥后，曰：「拜手稽首，后矣。」曰：「宅乃事，宅乃牧，宅乃準。」茲惟后矣。謀面用丕訓德，則乃宅人。茲乃三宅無義民。

集傳：古之人有行此道者，惟有夏之君當王室大強。

之時而求賢以為事天之實也。廸知者蹈知而非苟知也。忱恂者誠信而非輕信也。言夏之臣蹈知誠信于九德之行，乃敢告教其君曰：「拜手稽首后矣。」云者，致敬以尊其為君之名也。曰「宅乃事」，宅乃牧，宅乃準，茲惟后矣。云者，致告以叙其為君之實也。茲者，此也。言如此而後可以為君也。即臯陶與禹言九德之事，謀面者，謀人之面貌也。言非廸知忱恂于九德之行，而徒謀之面貌，用以為大順於德，乃宅而任之如此。

則三宅之人豈復有賢者乎蘇氏曰事則向所謂常  
任也牧則向所謂常伯也準則向所謂準人也一篇  
之中所論宅俊者參差不齊然大要不出是三者其  
餘則皆小臣百執事也吳氏曰古者凡以善言語人  
皆謂之教不必自上教下而後謂之教也

集說

林氏之奇曰天下有至強之勢不在於山川之險甲兵之銳人民之衆惟在於賢才之多而已

能求賢才而用之則其勢無敵矣豈不大競乎籲呼  
也故籲俊有求賢之意惟禹以籲俊為心故其臣亦  
以薦揚為務○呂氏祖謙曰自皋陶以九德告禹夏  
后蓋世守以為知人之法焉方夏之盛任三宅者如

此及其衰也。並至于曾無義民言所任者皆不義之人。無一君子也。茲乃云者此乃三宅之位非他位也。猶無義民則他可知矣。○陳氏大猷曰宅者居而安之之謂。或才德不稱或委任不篤皆非宅也。○陳氏櫟曰公既嘆知恤者鮮。歷舉古之知恤者以告王。夏后商湯文武皆知恤此者以次言之也。人中之俊乃天生之以遺國家者。俊非徒才俊必有德如所謂以克俊有德。臯陶亦曰九德咸事。俊人在官未嘗岐俊與德而二之。○陳氏雅言曰有夏之君信能行此用賢之道不以國家之盛治為已足。惟以賢俊之當籲為未至。其事天之道至矣。有夏之臣信能有此九德之行。故不徒致敬以尊其為君之名而且致告以叙其為君之寔其事君之道得矣。夏之君臣各盡其道此其立政之要也。以上迪字與下迪知忱恂作對說。呂氏謂周公之戒成王自綴衣虎賁之外其禮其辭與夏略同。然則以圖任三宅為人君之職者三代告

君之常法也表親近之職使人君不敢輕者周公養源之精意也○王氏樵曰古之賢臣以人事君古之賢王以人事天

桀德惟乃弗作往任是惟暴德罔後

集傳夏桀惡德弗作往昔先王任用三宅而所任者乃惟暴德之人故桀以喪亡無後

集說

呂氏祖謙曰非人才果異于往日也桀之惡德弗作往日先王之任用而已往惟俊德是任效

見於有室大競桀惟暴德是任效見于絕世無後信乎存亡在所任也

亦越成湯陟丕釐上帝之耿命乃用三有宅克即宅曰

三有俊克即俊嚴惟丕式克用三宅三俊其在商邑用  
協于厥邑其在四方用丕式見德

集傳亦越者繼前之辭也耿光也湯自七十里升為  
天子典禮命討昭著於天下所謂陟丕釐上帝之光  
命也三宅謂居常伯常任準人之位者三俊謂有常  
伯常任準人之才者克即者言湯所用三宅實能就  
是位而不曠其職所稱三俊實能就是德而不浮其  
名也三俊說者謂他日次補三宅者詳宅以位言俊

以德言意其儲養待用或如說者所云也惟思式法也湯於三宅三俊嚴思而不法之故能盡其宅俊之用而宅者得以效其職俊者得以著其才賢智奮庸登于至治其在商邑用協于厥邑近者察之詳其情未易齊畿甸之協則純之至也其在四方用丕式見德遠者及之難其德未易徧觀法之同則大之至也至純至大治道無餘蘊矣曰邑曰四方者各極其遠近而言耳

集說

黃氏度曰曰三有俊辨論後來之俊可居此三宅者也克即俊就其所論定無不可登用也既

用三宅又韓三俊者文王之詩曰思皇多士生此王國王國克生維周之楨人材惟層出間見用之不盡而後國家之興為未艾也○呂氏祖謙曰嚴惟丕式嚴思賢者惟大則效之然後能用宅俊所謂學于伊尹而後臣之其一證也未用宅俊之前知之者惟湯既用之後則夫人而信之○蔣氏惇生曰嚴惟者其難其慎之謂簡擇於未用之前既用之必使為政于天下丕式者信任於使用之後○陳氏大猷曰事事物物之理莫非天命之流行典禮刑賞則其大者湯升天位大理想治上帝之明命謂大治天下使事物昭然各當于理即丕釐上帝之耿命也○陳氏櫟曰宅俊用而遠近孚蓋舉用當而人心服好人所好不拂人之性故也嚴惟丕式君大法乎賢也用丕式見德下之人因之而大法乎君也湯用三宅而且儲三俊



以供無窮之用上廣夏后之所未及而下為文武之所取法焉○王氏樵曰思慮精專一于賢者即九事委心聽順惟賢者是師而不自用便是丕式處○兩丕式字上言君丕式乎賢下言民丕式乎君四方之人皆大法乎君而以德自見所謂徧為爾德也○鄒氏禎期曰湯之心與宅俊合故商邑之心與湯合宅俊之德為湯所式故湯德又為四方所式也

嗚呼其在受德暨惟羞刑暴德之人同于厥邦乃惟庶習逸德之人同于厥政帝欽罰之乃倅我有夏式商受命奄旬萬姓

集傳羞刑進任刑戮者也庶習備諸衆醜者也言紂

德強暴又所與共國者惟羞刑暴德之諸侯所與共  
政者惟庶習逸德之臣下上帝敬致其罰乃使我周  
有此諸夏用商所受之命而奄甸萬姓焉甸者井牧  
其地什伍其民也

集說

王氏安石曰羞進也有崇尚之意桀紂所用非  
人皆本於身有惡德故曰桀德受德者推本言

之也○呂氏祖謙曰論夏商之興亡不出于任用得  
失之間立政之體統端在此矣○共政之任親于共  
國舉賢者拔其萃嗜惡者從其尤皆用其極者也○  
鄒氏季友曰井牧周禮小司徒井牧其田野注云井  
牧者裏二十五年左傳所謂井衍沃牧隰臯是也田  
制一夫百畝故百畝為夫九夫為井隰臯之地九夫

為牧二牧而當一井以田有不易一易再易通率二而當一也什伍周禮士師掌其民人之什伍又族師云五家為比十家為聯五人為伍十人為聯以受邦職以役國事○申氏時行曰同于厥邦是在外之諸侯同于厥政是在內之臣工用非人以理厥邦則四方之丕式無有矣狎小人以敗厥政則厥邑之用協無有矣正與湯相反

亦越文王武王克知三有宅心灼見三有俊心以敬事上帝立民長伯

集傳三宅三俊文武克知灼見皆曰心者即所謂迪知忱恂而非謀面也三宅已授之位故曰克知三俊

未任以事故曰灼見以是敬事上帝則天職修而上有所承以是立民長伯則體統立而下有所寄人君位天人之兩間而俯仰無忤者以是也夏之尊帝商之不釐周之敬事其義一也長如王制所謂五國以爲屬屬有長伯如王制所謂二百一十國以爲州州有伯是也

集說

林氏之奇曰文武既有以當天之心故天命之以有天下則封建諸侯而天子端拱于上也此

所以立民長伯○呂氏祖謙曰三宅共政者也知其心者猶未盡則不能無間惟文武真能知其心也三

俊待用者也。未與事遇，則底蘊不外見。惟文武灼然見其心也。知宅俊皆曰：心者君臣相與萬化之源。苟貌親口惠，相期于肝膽之外，則無其本矣。○陳氏櫟曰：立民長伯當時宅俊，或有出而封為長伯者，歟？諸侯入為王官，王官出為諸侯，古常有之。○顧氏錫疇曰：克知二句是知之明，以敬事二句是任之重。○孫氏繼有曰：大抵人臣立朝，以心術為本。心術不正，縱行事可觀，言論可采，亦非吉士。克知灼見者，知其心之果正而無他即克知厥若之意。

### 立政任人準夫牧作三事

集傳言文武立政三宅之官也。任人常任也。準夫準人也。牧常伯也以職言。故曰事。

集說

張氏九成曰所謂立政豈無紀綱賞罰豈無典章文物周公乃無一言及之獨曰任人準夫牧

作三事而已○顧氏錫疇曰三事者庶官之首庶政之綱文武所慎簡者莫先于此此得其人使各舉所知各簡其屬無不得其人矣○孫氏繼有曰人君之政總之則柄歸于一人三事則分任之分之則事寄于百官三事則總率之故首列之

虎賁綴衣趣馬小尹左右攜僕百司庶府

集傳此侍御之官也趣馬掌馬之官

鄒氏季友曰周禮校人掌王馬

之政趣馬其屬也注云趣馬下士趣養馬者馬一十二匹立趣馬一人

小尹小官之長

攜僕攜持僕御之人

王氏樵曰孔傳左右攜持器物之僕蔡傳曰攜持僕御之人則

以為百司若司裘司服庶府若內府大府之屬也王氏

炎曰凡治事曰百司凡掌財曰庶府○陳氏師凱曰周官有王府內府外府泉府天府

集說

顧氏錫疇曰官府合為一體天子自大臣召對外惟此侍御之官親近周旋自庸賁而下凡七

等官俱就得人說庸賁修武備以杜掖庭之威綴衣布物采以昭黼黻之煥趣馬閑輿衛以備法駕小尹正羣領以供法從左右攜僕如云左右攜持器物之僕以司稱者各辨所職服用之需於此取以府稱者各典所守儲蓄之備于此藏以上諸官俱是內官之長

大都小伯藝人表臣百司太史尹伯庶常吉士

集傳此都邑之官也呂氏曰大都小伯者謂大都之

伯小都之伯也

林氏之奇曰周禮以小都之田任縣地以大都之田任疆地注小都卿之

采邑大都公之采邑王子弟所食邑

大都言都不言伯小伯言伯不言

都互見之也

董氏琮曰古人立言之法有互文見意者如詩鉦人伐鼓之類是也藝人

者卜祝巫匠

陳氏師凱曰卜如太卜卜師龜人董人籒人占夢眡祲是也祝如太祝喪祝甸

祝詛祝是也巫如司巫男巫女巫巫神士是也匠如攻木攻金攻皮設色刮摩搏埴之工皆是也執技

以事上者

禮記王制曰凡執技以事上者祝史射御醫卜及百工

表臣百司表

外也表對裏之詞上文百司蓋內百司若內府內司

服之屬所謂裏臣也此百司蓋外百司若外府外司



服之屬所謂表臣也太史者史官也

周禮太史下大夫。孔氏穎達

曰周禮每官各有長若太史為史官之長

尹伯者有司之長如庖人內饔

膳夫則是數尹之伯也

陳氏師凱曰傳意謂庖人為庖尹內饔為饔尹而膳夫則

兼二者而為之伯也蓋庖饔各治其事而又統於膳夫也然此二句以下文比之必有脫字。王氏樵曰

庖人尹庖內外饔尹饔此呂氏原文蔡傳漏尹庖尹饔四字

鐘師尹鐘磬師尹磬

大師司樂則是數尹之伯也

陳氏師凱曰大師及司樂為鐘師磬師之伯此

二節特舉例以解尹伯以是求之尹伯固不止于此二者矣

凡所謂官吏莫不在

內外百司之中至於特見其名者則皆有意焉虎賁

綴衣趣馬小尹左右攜僕以扈衛親近而見庶府以  
冗賤人所易忽而見藝人恐其或興淫巧機詐以蕩  
上心而見太史以奉諱惡

陳氏師凱曰王制云太史  
典禮執簡記奉諱惡簡記

策書也大事書於策小事簡牘諱  
先王名也惡忌日也及子卯不樂公天下後世之是

非而見尹伯以大小相維體統所係而見若大都小  
伯則分治郊畿不預百司之數者既條陳厯數文武  
之衆職而總結之曰庶常吉士庶衆也言在文武之  
廷無非常德吉士也

集說

呂氏祖謙曰人之相去何啻千百等用之者小  
大亦各有方今合而謂之吉士蓋長短雖不齊  
要皆慈祥良善之人而不容一慘刻傾險者投足其  
間此文武用人大法所以立周家忠厚之治體也  
○陳氏經曰文武以一人之聰明豈能周知內外遠  
近小大之臣哉三宅大臣人主所親擇其下小大之  
臣又委之三宅高宗曰惟暨乃僚穆王亦曰慎簡乃  
僚皆然也○孫氏繼有曰庶常吉士一句總上立政  
以下來并下二節蓋無德不可謂之吉即有而不常  
亦偽耳非吉也惟文武克知灼見而後用之故自三  
宅以至百官無一非常德之吉士不特三宅可以事  
上帝長庶民而餘皆可以分天職佐民瘼此謂得人  
之盛

司徒司馬司空亞旅

集傳此諸侯之官也司徒主邦教司馬主邦政司空主邦土餘見牧誓言諸侯之官莫不得人也諸侯之官獨舉此者以其名位通於天子歟

集說

林氏之奇曰司徒司馬司空諸侯之三卿也亞其貳也旅其衆士也○呂氏祖謙曰先儒以三

卿為文武未代紂前官制苟果皆文武在廷之官何繇重出于庶常吉士之後乎此章蓋通叙文武之官文王雖不有天下武王克商官制寔達乎四海其為侯國之官無疑也○陳氏師凱曰案康誥言圻父農父宏父三卿亦與此同可見此為諸侯之官蓋大國三卿兼攝六事傳謂名通天子者大國三卿皆命于天子也

夷微盧烝三亳阪尹

集傳此王官之監於諸侯四夷者也微盧見經

孔氏穎達

曰牧誓所云有微盧彭濮人此舉夷微盧以見彭濮之等諸夷也

亳見史三亳蒙為

北亳穀熟為南亳偃師為西亳

地理今釋案蔡傳云三亳蒙為北亳穀熟

為南亳偃師為西亳今河南歸德府商邱縣北四十里有大蒙城水經注云汴水東經大蒙城北疑即蒙亳也所謂景亳為北亳矣南亳西亳詳見湯誥烝或以為衆或以為夷名阪

未詳古者險危之地封疆之守或不以封而使王官

治之參錯於五服之間是之謂尹

孔氏穎達曰夷微以下以一尹總之

地志載王官所治非一此特舉其重者耳自諸侯三卿以降惟列官名而無他語承上庶常吉士之文以內見外也夫上自王朝內而都邑外而諸侯遠而夷狄莫不皆得人以為官使何其盛歟

集說

林氏之奇曰言夷微盧之衆及三亳之地與夫九阪險之地為之尹者無不得人也○王氏樵

曰微盧烝蓋夷國之內屬者武王伐商微盧嘗從焉為之置尹如漢為西域置都護之比也險危之地不必邊裔如陝之崤函趙之井陘鄭之常牢皆參錯於五服之間者○孫氏繼有曰夷情叛服亦係中國安危故設為尹以監之尹雖遠臣而內藩王室外攝夷情不得其人亦足致亂故附于吉士之後

文王惟克厥宅心乃克立茲常事司牧人以克俊有德  
集傳文王惟能其三宅之心能者能之也知之至信  
之篤之謂故能立此常任常伯用能俊有德也不言  
準人者因上章言文王用人而申克知三有宅心之  
說故略之也

集說

朱子曰文王惟克厥宅心人皆以宅心為處心非也即前面所說三有宅心耳若處心則云克

宅厥心○吳氏澄曰惟能心其心故能于其官而能得其人也三克字皆謂文王能之○陳氏櫟曰以宅心為三宅之心與上文克知三有宅心合為一說○陳氏雅言曰天下之賢固莫難于獲其用尤莫難于

盡其用謂之以克俊有德者蓋才德雖常事司牧人之所固有然所以能究其用者寔文王之克厥宅心有以致之也知之至信之篤文王之心與三宅之心昭合交契無毫髮彼此之間故能立此常事司牧人而其有才有德莫不竭盡其蘊無敢或隱其賢是豈徒常事司牧人之所自能哉皆以文王克之而後能也○王氏樵曰三克字最有力言文王之知人惟克知其心乃克立其官以克稱其任之人也人君未嘗不欲其官之得人惟此之權度未精而彼之底蘊未盡則情偽可得而亂邪正可得而易位置之間不覺人官每至于相左也常事常任也司牧人常伯也

文王罔攸兼于庶言庶獄庶慎惟有司之牧夫是訓用

違



集傳庶言號令也庶獄獄訟也庶慎國之禁戒儲備  
也有司有職主者牧夫牧人也文王不敢下侵庶職  
惟於有司牧夫訓勅用命及違命者而已漢孔氏曰  
勞於求才逸于任賢

集說

傅氏元初曰文王三宅之賢無非常德吉士安  
得有違命者推誠任人馭下有體只是訓戒之

欲其用命不  
欲其違命耳

庶獄庶慎文王罔敢知于茲

集傳上言罔攸兼則猶知之特不兼其事耳至此罔

敢知則若未嘗知有其事蓋信任之益專也上言庶  
言此不及者彌令出於君有不容不知者故也呂氏  
曰不曰罔知于茲而曰罔敢知於茲者徒言罔知則  
是莊老之無為也惟言罔敢知然後見文王敬畏思  
不出位之意毫釐之辨學者宜精察之

集說

王氏安石曰君道以擇人為職上必無為而用  
天下下必有為而為天下用此君臣之分也○

陳氏櫟曰牧夫即宅牧之屬上文只及常事司牧人  
而不及準人庶獄即準人之事也此篇論三宅有全  
言之者有舉其二者有  
舉其一者參錯及之耳

亦越武王率惟敕功不敢替厥義德率惟謀從容德以並受此丕丕基

集傳率循也敕功安天下之功義德義德之人容德容德之人蓋義德者有撥亂反正之才容德者有休休樂善之量皆成德之人也周公

王氏樵曰公字下闕一承字

上

文言武王率循文王之功而不敢替其所用義德之人率循文王之謀而不敢違其容德之人意如虢叔閔天散宜生奉顛南宮适之徒所以輔成王業者文

用之於前武任之於後故周公於君奭言五臣克昭  
文王受有殷命武王惟茲四人尚迪有祿正猶此叙  
文武用人而言並受此丕丕基也

集說

胡氏士行曰用義德之賢以戡定用容德之賢以計安立政任人之意也○吳氏澄曰武王率

循文王之功其于義德之人用之而不敢替率循文王之謀其于容德之人從之而不敢違蓋拯民危急必資剴裁之能詒謀宏遠必資寬大之度此武王述事繼志而不改父之臣故父子並受此大大之基業也○王氏充耘曰能撥亂反正所以能成大功能兼總衆善所以能定大謀○王氏希旦曰紂用暴德逸德之人正與此相反○呂氏柟曰立政止言文王用三宅三俊武王率文王不言宅俊而言義德容德者

何非有義德之才容德之量者不足以居三事也○  
王氏樵曰此言武王能用文王之人又武王知人任  
人之要也自其以武功定天下謂之功文王之功威  
矣而輔之者義德之臣也武王率循而不替焉蓋其  
爽邦劉敵之臣即戡黎代崇之彥豈有勿作往任者  
哉自其以文德經天下謂之謀文王之謀大矣而輔  
之者容德之臣也武王率循而不違焉蓋其稽謀自  
天之者即秉德迪知之賢豈但不改其臣而已哉

嗚呼孺子王矣繼自今我其立政立事準人牧夫我其  
克灼知厥若丕乃俾亂相我受民和我庶獄庶慎時則  
勿有間之

集傳我者指王而言若順也周公既述文武基業之

大歎息而言曰孺子今既為王矣繼此以往王其於立政立事準人牧夫之任當能明知其所順順者其心之安也孔子曰察其所安人焉廋哉察其所順者知人之要也夫既明知其所順果正而不他然後推心而大委任之使展布四體以為治相助左右所受之民和調均齊獄慎之事而又戒其勿以小人間之使得終始其治此任人之要也民而謂之受者言民者乃受之於天受之於祖宗非成王之所自有也

集說

孔氏穎達曰自此以下四言繼自今者九人靡

用賢也○張氏九成曰王繼文武以立政可謂難矣而難之中自有簡易之道亦曰立事準人牧夫我其克灼知厥若而已知三宅之心即所以立政○呂氏祖謙曰物莫不有所順水順而下火順而上盖有湮之而不下鬱之而不上者矣終非其所順也人豈無矯飾以勉為善者苟能灼知其所順則心之所安不得遁矣夏后宅人亦曰用丕訓德訓順也知厥若又勿使異意者間之知人不可不盡任人不可不專竭兩端告之也○董氏琮曰孔氏以立政為大臣立事為小臣諸家皆以立政立事為一意而於準人牧夫則以為舉其二以包其一理所未安竊意從張氏之說則立政乃作書之本意立事乃任人之官庶於經意為兩得○陳氏大猷曰我者我其君君臣一體也○王氏希旦曰提起立政二字最是下文商人周文

王立政國則罔有立政用檢人在今後嗣王立政皆是提起作書之本意立政之要在於事牧準人○陳氏雅言曰克灼知厥若者此明于知人時則勿有間之此誠於任人始焉而非知之明則無以得賢才之用終焉而非任之誠則無以盡賢才之用成湯之克宅克即文武之克灼見皆克知厥若之謂也成湯之嚴惟丕式文王之罔攸兼罔敢知皆時則勿有間之之意也周公前舉三事以為告此則欲其法三代之法以為政上言知人之要則舉三宅之名下言任人之要則舉三宅之職立政一篇之旨萃于此矣○張氏居正曰灼知厥若則能明察于未任之先而匪人不得以倖進勿有間之則能篤信于既任之後而君子不至于孤危此兩言者任賢之要道也○王氏樵曰立事即常任牧夫即常伯此處乃是簡舉三宅官名相受民牧之責也和庶獄準之責也和庶慎事之責也前章常事司牧人即常任常伯舉其二以包



準人也有司之牧夫舉一以包常任準人也既是舉一以包二則不必以庶言等三件事為三宅通有也  
自一話一言我則未惟成德之彥以又我受民

集傳末終惟思也自一話一言之間我則終思成德之美士以治我所受之民而不敢斯湏忘也

集說

陳氏櫟曰話言樞機之發也委任三宅欲勿以小人間之苟或一話言間微不終于專主君子

則小人乘間入之矣此公戒王以委任三宅專一周密之法也○王氏樵曰自一話一言承勿有間之而言言人君思慮當專在於君子無一話言之間而後君子得終其治斯民得受其福也

嗚呼予旦已受人之徽言咸告孺子王矣繼自今天子

文孫其勿誤于庶獄庶慎惟正是人之

集傳前所言禹湯文武任人之事無非至美之言我  
聞之於人者已皆告孺子王矣文子文孫者成王武  
王之文子文王之文孫也成王之時法度彰禮樂著  
守成尚文故曰文誤失也有所兼有所知不付之有  
司而以已誤之也正猶康誥所謂正人與宮正酒正  
之正指當職者為言不以已誤庶獄庶慎惟當職之  
人是治之下文言其勿誤庶獄惟有司之牧夫即此

意

集說

呂氏祖謙曰簡畀正人付之獄慎使之以正法斷刑以正理揆事所謂正道也苟不知正道雖惴惴欲其勿誤能勿誤乎○金氏履祥曰誤者以身兼之事煩力寡易于致誤○王氏樵曰上言勿間之以人此言勿誤之以已大抵人君任賢不專其弊有是二端故反覆言之也

自古商人亦越我周文王立政立事牧夫準人則克宅之克由繹之茲乃俾乂

集傳自古及商人及我周文王於立政所以用三宅之道則克宅之者能得賢者以居其職也克由繹之

者能紬繹用之

王氏樵曰案由字只如字讀傳謂紬繹用之是以意解非即以由字為紬

字也紬音抽漢書谷永傳云燕見而盡其才也既能紬繹師古曰紬繹者引其端緒也

宅其才以安其職又能繹其才以盡其用茲其所以能俾乂也歟

集說

呂氏祖謙曰由繹由其外而繹其中也由其言而繹其心由其才而繹其德由其發舒于一時

而繹其持久于歲晏者繹之蓋不一端而足也克宅之則人與位相稱克由繹之則表與裏相符其審如是然後俾之為治既俾之為治則一委之其人矣○陳氏經曰繹如繹絲謂窮其端緒克宅任之當矣又紬繹之詳其所行考其所就猶堯之詢事考言舜之明試考績也○陳氏雅言曰三宅之官百官有司之

長也擇之不審則以正為邪以不肖為賢固不足以得賢才之用用之不至則禮貌之或衷意見之或殊亦何足以盡賢才之用故克宅之者以心相照此知人之明也克由繹者以心相與此待人之誠也謂之乃者言必如是而後有以得其心也謂之俾者言下之治由于上之使也立政一篇之旨皆是言人君之用人當擇之于始善用之於終

國則罔有立政用儉人不訓于德是罔顯在厥世繼自今立政其勿以儉人其惟吉士用勤相我國家

集傳自古為國無有立政用儉利小人者小人而謂之儉者形容其沾沾便捷之狀也儉利小人不順于

德是無能光顯以在厥世王當繼今以往立政勿用  
儉利小人其惟用有常吉士使勉力以輔相我國家  
也呂氏曰君子陽類用則升其國於明昌小人陰類  
用則降其國於晦昧陰陽升降亦各從其類也

集說

張氏九成曰儉人者傾巧辯給之人詐足飾非  
言足拒諫悅其心則譽桀紂為堯舜失其意則

誣伯夷為盜跖○呂氏祖謙曰人主惟以別白君子  
小人為職國之興亡常必由之此篇反覆於君子小  
人之際有旨哉文武有庶常吉士公復以其惟吉士  
望王召公之歌詩王多吉士亦至于再穆王命伯圉  
吉士猶在口也是則周家父祖所傳師保所訓子孫  
所守惟在吉士一代治體可識矣儉人者吉士之反

周之家法所嚴惡斥絕者也。○王氏綱振曰：儉人不是容悅小人，孔傳云：儉利小人正言其才智機鋒能聳發人主以為必可共功，必能顯世而不知究竟罔顯也。

今文子文孫孺子王矣，其勿誤于庶獄，惟有司之牧夫集傳始言和我庶獄，庶慎時則勿有間之，繼言其勿誤于庶獄，庶慎惟正是入之，至是獨曰其勿誤于庶獄，惟有司之牧夫，蓋刑者天下之重事，挈其重而獨舉之，使成王尤知刑獄之可畏，必專有司牧夫之任而不可以已誤之也。

集說

孔氏穎達曰言庶獄欲其重刑言有司牧夫欲其慎官人○蔡氏卞曰以庶獄庶慎對庶言則

獄慎尤重故不及庶言以庶獄對庶慎則庶獄尤重故不及庶慎○呂氏祖謙曰獄曷為其獨重也民命所繫亦國命所繫也導迎善氣祈天永命者獄也並告無辜無世在下者亦獄也宜周公獨言而獨戒之○顧氏錫疇曰曰文子文孫見有續承之責曰孺子王矣見其居天位之尊

其克詰爾戎兵以陟禹之迹方行天下至于海表罔有不服以覲文王之耿光以揚武王之大烈

集傳詰治也治爾戎服兵器也陟升也禹迹禹服舊迹也方四方也海表四裔也言德威所及無不服也



覲見也耿光

陳氏大猷曰耿亦光也耿光光之著也

德也大烈業也於

文王稱德於武王稱業各於其盛者稱之呂氏曰兵  
刑之大也故既言庶獄而繼以治兵之戒焉或曰周  
公之訓稽其所弊得無啓後世好大喜功之患乎曰  
周公詰兵之訓繼勿誤庶獄之後犴獄之間尚恐一  
刑之誤況六師萬衆之命其敢不審而誤舉乎推勿  
誤庶獄之心而奉克詰戎兵之戒必非得已不已而  
輕用民命者也

集說

林氏之奇曰呼文子文孫言守成以文終以詰爾戎兵則武不可弛○呂氏祖謙曰公非教王

用兵恐其晏安而使之自強如易謙卦言利用侵伐亦是于謙抑之中有自強之意也蓋奮張其氣而不使墮偷操握其衆而不使捍格摧壓其好而不使覲覲保治之良圖也古人治兵乃所以弭兵後世銷兵乃所以召兵○金氏履祥曰古人詰兵蓋有國之常政軍伍藏於井甸陣法講于蒐狩射御習于鄉學巡邊四征寓于巡狩會同但恐守文之主或自廢弛爾況其時淮奄未盡平故周公言及之○王氏樵曰禹迹即所謂弼成五服至於五千外薄四海咸建五長聲教訖于四海是也陟謂今威德所加盡禹迹所至也方行德威之流行也文王之耿光於四方顯于西土武王之大烈永清四海丕單稱德覲揚謂不遏侯之顧文子文孫而言

嗚呼繼自今後王立政其惟克用常人

集傳并周家後王而戒之也常人常德之人也臯陶曰彰厥有常吉哉常人與吉士同實而異名者也

集說

呂氏祖謙曰常人之於國也蓋食之穀粟衣之布帛雖無異味異文而有生者常用而不可一

日易也然每多重遲木訥不能與小慧新進者爭長於頰舌之間故世主惑於取舍而治亂分焉此周公所以慨歎而深致意於卒章歟○陳氏大猷曰理之常行而不可易者為常道行此常道而不可易者為常人常言其體之不易言其用之休祥也言常人于兵刑之後以常人尤宜任此而謹之歟○金氏履祥曰周公丁寧之意并後王而戒之使成王行之後王傳之以為家法也常人儉人二者相反凡儉利便捷

者儉人也凡持重守正者常人也儉人常以生事為功常人常以生物為意此用人者所當辨也

周公若曰太史司寇蘇公式敬爾由獄以長我王國茲式有慎以列用中罰

集傳此周公因言慎罰而以蘇公敬獄之事告之太史使其并書以為後世司獄之式也蘇國名也左傳

蘇忿生以溫為司寇

孔氏穎達曰成十一年左傳云昔周克商封蘇忿生以溫為司

寇是忿生為武王司寇封蘇國也

周公告太史以蘇忿生為司寇用

能敬其所由之獄培植基本以長我王國令于此取

法而有謹焉則能以輕重條列

蘇氏軾曰列者前後相比猶今言例也

用其中罰而無過差之患矣

集說

孔氏安國曰言主獄當求蘇公之比此法有所慎行必以其列用中罰不輕不重○陳氏大猷

曰蘇公能以法式而敬其所用之獄重民命以延國命治獄者當以為法式而有謹焉以舊事為比而用其輕重之中者也立政以用人為本而兵刑乃政之大者故以此終焉○陳氏櫟曰立政之綱領在三宅三宅中所重尤在準人之刑獄故既告王以勿誤庶獄末復命太史書蘇公敬獄事以示法焉蘇公所以為司寇在乎敬後人之法蘇公在乎慎能慎則能敬矣固為後之司獄者慮尤為後之君用人以司獄者慮能如蘇公者則用否則斥蓋以此終立政用人之意歟○陳氏雅言曰敬者慎之存于心慎者敬之見

於事○王氏樵曰漢有決事比周禮小司寇登中于天府注曰取其計獄蔽訟之得其中者上于天府使藏之以為法比後罪犯有合于是者則援引以為質也即列用中罰之意觀此則引法律條以定罪其來久矣○式敬之式用也茲式之式法也茲式有慎周公欲後之典獄者如是欲後之任典獄者必擇如是之

人也

總論

董氏鼎曰王政莫大于用人用人莫先于三宅

三宅得人則百官皆得人而王政立矣一篇之中宅事牧準其綱領也休茲知恤其血脈也自迪惟有夏至暴德罔後言夏先后知恤乎此乃室大競休何如哉桀不知恤也故罔有後而成湯陟焉自亦越成湯至奄旬萬姓言商先王知恤乎此故用協用見德休何如哉紂不知恤也故帝罰之而我周式商受命焉自亦越文王武王至並受丕丕基言文武亦猶

夏商先王之知恤也是以並受丕基式克至今日休也自孺子王矣以下至終篇拳拳以去憚人用常吉詰戎兵謹刑獄為王告蓋欲王以先王之知恤為法以夏商後王之不知恤為鑒忠愛之至至今可挹也

## 周官

集傳成王訓迪百官史錄其言以周官名之亦

訓體也今文無古文有○案此篇與今周禮不

同如三公三孤周禮皆不載或謂公孤兼官無

正職故不載

陳氏師凱曰周禮未嘗不言公孤但不載其專職耳如云王之三公

八命出封加一等則九命為伯是舉朝無尊於此者而外朝之位三公在前孤卿大夫在左公

侯伯子男在右是惟三公可以面天子孤則亞于三公故其位與諸侯之公相對六卿莫敢先也其摯孤執皮帛卿執羔則卿亞於孤又可見矣然三公論道經邦三

孤貳公弘化非職乎職任之大無踰此矣或又

謂師氏即太師保氏即太保然以師保之尊而

反屬司徒之職亦無是理也

陳氏師凱曰師氏僅中大夫保氏乃

下大夫豈有三公之尊而資級如是之卑耶周禮注謂周召魚此官必無是理案師氏以三德三行教國子保氏以六藝六儀教國子猶後世國子先生之儔故列在司徒之屬又此

言六年五服一朝而周禮六服諸侯有一歲一



見者二歲一見者三歲一見者亦與此不合是  
固可疑然周禮非聖人不能作也意周公方條  
治事之官而未及師保之職所謂未及者鄭重  
而未及言之也書未成而公亡其間法制有未  
施用故與此異而冬官亦闕要之周禮首末未  
備周公未成之書也惜哉讀書者參互而考之  
則周公經制可得而論矣

集說

○孔氏安國曰言周家設官分職用人之法  
孔氏穎達曰設官分職周禮序官之文

言設置羣官分其職掌經言立三公六卿是設官也各言所掌是分職也各舉其官之所掌示以才堪乃得居之是說用人之法○朱子語類問司徒司馬司空三公三少之官曰漢自古文尚書出方有周官篇伏生口授二十五篇無周官故漢只置太尉司徒司空為三公而無周三公三少蓋未見古文尚書但見伏生書牧誓立政篇中所說司徒司馬司空而置也古者諸侯之國只置得司徒司馬司空三卿惟天子方得置三公三少六卿牧誓立政所說周家是時方為諸侯故不及三公三少及周官篇所說則周是時已得天下矣三公三少本以師道傳佐天子只是加官周公以太師兼冢宰召公以太保兼冢宰是以加官而兼宰相之職也後世官職益紊今遂以三公三少之官為階官不復有師保之任論道經邦之責矣然古者猶是文臣之

有功德重望者方得加師保之官以其有教輔  
天子之名也後世遂以諸子或武臣為之既是  
天子之子與武臣豈可任師保之責邪說謬傳  
輒不復改正○陳氏櫟曰周禮周公未全未行  
之書周官成王建置訓迪已施行之書也今只  
當據周官以解周官其與周禮不合處略之可  
也

惟周王撫萬邦巡侯甸四征弗庭綏厥兆民六服羣辟  
罔不承德歸于宗周董正治官

集傳此書之本序也庭直也葛氏曰弗庭弗來庭者  
六服侯甸男采衛并畿內為六服也禹貢五服通畿

內周制五服在王畿外也周禮又有九服侯甸男采衛蠻夷鎮蕃與此不同宗周鎬京也董督也治官凡治事之官也言成王撫臨萬國巡狩侯甸

孔氏穎達曰六服而

惟言侯甸者二服去圻最近舉近以言之也

四方征討不庭之國以安天

下之民六服諸侯之君無不奉承周德成王歸于鎬京督正治事之官外攘之功舉而益嚴內治之脩也唐孔氏曰周制無萬國惟伐淮夷非四征也大言之爾

集說

林氏之奇曰當成王之時六合為周聲教所暨率皆臣服獨淮夷未平爾淮夷未平則當時六

服之君固雖洗心滌慮以奉承天子之德而行之然謂之莫不承德則不可也惟滅淮夷而遷以化之則是莫不承德矣如舜之世聲教所暨訖于四海惟三苗不服必至于苗民之格然後為至治也○呂氏祖謙曰成王撫萬邦至罔不承德乾開坤闔秋殺春生四海皆隨其運轉功成治定歸于宗周董正治官訓督裁正品式備具本末內外體統相承萬世皆入其維持不如何以觀文王之耿光揚武王之大烈乎○王氏充耘曰成王為萬邦之君盡撫綏之道侯甸之諸侯以時而來朝者則巡守其土而察其政治焉四方之諸侯其或有弗庭者則征伐其國而使畏懼焉巡守征伐皆以綏安億兆之民而已在外之事無不舉于是歸於鎮京國都以為端本發源之計天子所與共治于內者莫大于三公而其亞為三孤又次

為六卿而其下各有屬昔非無是官也有是官而網紀之未定昔非無是職也有是職而體統之未明故立三公使論道而三孤則輔之于後命六卿使分職一而其屬則任之于下如絲牽而繩聯如臂動而指隨以立一代之定制以承歷代之弘規無有董之而不治正之而或紊者既治其外復詳其內傳所謂外攘之功舉而益嚴內治之修者如此○陳氏櫟曰巡甸即六服而畧言之也六服承德即九服而以內五服并王畿言之也內五服九州內外四服九州以外五服并畿內為六正與侯甸男邦采衛之辭合略外四服耳○陳氏師凱曰周禮王畿千里外有九服每服五百里則每方五九四千五百合之為九千里通王畿為方萬里以開方法計之方千里者為方百里者百則方萬里者為方百里者萬矣以百里為諸侯之國率之是九服之內可容萬國然周初會于牧野者八百諸侯王制所計亦止千七百七十三國故

孔氏以此為大言之非寔數也然史官例以萬邦萬國言一統之廣其來久矣○陳氏雅言曰當功成治定之日而致謹于建官分職之命蓋天下以一人為主致治以任官為要萬邦雖廣而承德之心無不同外擴既舉而治官之政不敢後史臣將欲述成王訓迪之辭而先叙其本末如此○王氏樵曰撫萬邦只言君臨天下之意省方觀民去暴除殘皆所以安天下之民也六服承德則是素直而賢者固于旬于宣以廣一人之德化悔其不直者亦來享來王以奉天子之威靈

王曰若昔大猷制治于未亂保邦于未危

集傳若昔

林氏之奇曰若者發語之辭若昔猶曰在昔也

大道之世制治保

邦于未亂未危之前即下文明王立政是也

集說

孔氏頴達曰治謂政教邦謂國家治有失則亂邦不安則危制其治于未亂之前安其國于未

危之前標此二句于前以示立官之意○陳氏櫟曰王意謂今兆民綏六服承若已安已治然治亂在庶官當先幾而備之將言唐虞夏商周之建官故以此三言開端焉○顧氏錫疇曰未亂就正理說是綱紀法度無不修治之謂未危就國祚說是天下國家無不奠安之謂

曰唐虞稽古建官惟百內有百揆四岳外有州牧侯伯庶政惟和萬國咸寧夏商官倍亦克用乂明王立政不惟其官惟其人

集傳百揆無所不總者四岳總其方岳者州牧各總



其州者侯伯次州牧而總諸侯者也百揆四岳總治于內州牧侯伯總治于外內外相承體統不紊故庶政惟和而萬國咸安夏商之時世變事繁觀其會通制其繁簡官數加倍亦能用治明王立政不惟其官之多惟其得人而已

集說

孔氏穎達曰舜典云肇十有二州此說虞事知置州牧十二也侯伯謂諸侯之長益稷篇云外

薄四海咸建五長知侯伯是五國之長也○呂氏祖謙曰唐虞建官惟百而謂之稽古則官之有百蓋前于唐虞矣侯伯逮春秋猶襲以霸者之稱在唐虞則必次州牧而總諸侯者也若曰五等之侯伯則奚獨

置其三者而舉二也治道之達自百揆而受之以四  
岳自四岳而受之以州牧自州牧而受之以侯伯唐  
虞之治綱可識矣唐虞之官見于書者猶多成王獨  
舉其四惟識其大故能絜其綱也夏商之官倍之觀  
其會通而制其繁簡也○張氏震曰事繁故官多然  
大體未嘗變也舜命九官至商列為八政至周合為  
六典大綱皆出於一所增特其屬耳○王氏樵曰官  
者治亂安危之所出人則制之保之者也惟其人是  
一篇之要○孫氏繼有曰明王立政不惟其官之  
繁簡惟得其人則簡固又繁亦又此惟人之謂也

今予小子祇勤于德夙夜不逮仰惟前代時若訓迪厥  
官

集傳逮及時是若順也成王祇勤于德早夜若有所

不及然蓋修德者任官之本也

集說

呂氏祖謙曰成王實用力于此而真知其不足所以仰惟前代時若訓迪厥官而共治之也德

君德也

祇勤于德則止其所而非叢脞也訓迪厥官

訓導之俾各知所職下文所序是也

○陳氏經曰仰

前代唐虞夏商建官之意而時若之

○陳氏櫟曰唐

虞稽古至亦克用人此唐虞夏商之建官所以致治

保邦者也立政而官惟其人為政在人也訓官而先

祇勤于德取人以身也此成王仰若唐虞夏商而訓

官以致治保邦者也○王氏樵曰董正訓迪一也分

為二節正其體統一也訓其職守二也如三孤貳公

六卿分職六職之中冢宰又統百官六卿又各率其

屬外之九牧又統諸侯以聽六卿之倡此所謂體統

也公論道孤弘化六卿各有所掌六屬受六卿之率

各有所司九牧受六卿之倡宣布于諸侯各有其事

以至成王之所告戒自有官君子以下皆職守也

立太師太傅太保茲惟三公論道經邦燮理陰陽官不  
必備惟其人

集傳立始辭也三公非始于此立為周家定制則始  
于此也賈誼曰保者保其身體傅者傅之德義師道  
之教訓此所謂三公也陰陽以氣言道者陰陽之理  
恒而不變者也易曰一陰一陽之謂道是也論者講  
明之謂經者經綸之謂燮理者和調之也非經綸天

下之大經參天地之化育者豈足以任此責故官不  
必備惟其人也

集說

周子曰陰陽理而後和○程子曰三代之時人  
君必有師傅保之官師道之教訓傳傳之德義

保保其身體後世作事無本知求治而不知正君知  
規過而不知養德傳德義之道固已疎矣保身體之  
法復無聞焉輔養之道非謂告詔以言過而後諫也  
傳德義者在乎防見聞之非節嗜好之過保身體者  
在乎適起居之宜存畏慎之心三公不必備惟其人  
誠以為不得其人而居之不若闕之之愈也○王氏  
樵曰道者即經綸邦國和調陰陽之道也惟三公以  
道為天子師為能知其所以然之故則使之論說于  
天子之前故論道皆所以經邦而變理陰陽經邦變  
理皆寔事則論道非空言也○申氏時行曰道者陰

陽之理所以綱紀人物而運行造化論是闡明其理以啓沃君心涵養君德者經邦是經理邦國之民物即論道時事謂其議道以置法而有裁成輔相之規模明道以出治而有經綸康濟之謨略得是理以立命者使各止其所而不亂具是理以成性者使各就其緒而不紊也變理陰陽謂由是以均調氣機參贊化育使五行順布而陰陽無乖戾之虞四序節宣而陰陽無愆伏之患也亦只是以民物之和兆陰陽之和論道處有格心體段變理處有格天事業三公道尊望重所以嚴其選也

少師少傅少保曰三孤貳公弘化寅亮天地弼予一人  
集傳孤特也三少雖三公之貳而非其屬官故曰孤  
天地以形言化者天地之用運而無迹者也易曰範

圍天地之化

陳氏師凱曰範模也圍在郭也聖人範

圍于聖人精神心術之中如物之得其模範在郭而不違也

是也弘者張而大之

寅亮者敬而明之也公論道孤弘化公變理陰陽孤寅亮天地公論於前孤弼於後公孤之分如此

集說

孔氏安國曰孤卑于公尊於卿特置此三者副貳三公弘大道化○葉氏夢得曰成王以周召

為師保而太傅無聞周公沒召公仍為保而不聞設師傳蓋難之也○朱子曰三公三孤本無職事亦無

官屬但以道義輔佐天子而已三公三少只是加官

○呂氏祖謙曰陰陽以氣言天地以形言變理運之

者也寅亮承之者也公孤之分于此著矣然弼予一人乃格君心之任獨于孤言之而公之職反不與焉

何也論道經邦變理陰陽未有不有君心者也○陳氏傳良曰周召以師保為冢宰是卿兼三公也顧命自同召太保爽以下皆卿也是時召公為保兼冢宰芮伯為司徒彤伯為宗伯畢公為司馬皆是以三公兼之衛侯康叔為司寇毛公為司空審如是則三公多是六卿兼之但其人足以兼公則如其公之職位無其人則止為卿而已三公三孤皆無其人則闕焉而已而六卿自若也要之成周以三公三孤待非常之德故曰官不必備惟其人○陳氏櫟曰貳公弘化蓋貳公以弘大其論道經邦之化耳弘大道化以寅亮天地體用之謂也○王氏樵曰弘化即三公之論道經邦也寅亮天地即三公之變理陰陽也弘如人能弘道之弘蓋天地無為而吾之所講明推行者無非所以弘化也化者天地之用而弘之者人使天地之心徧于萬物庶事無不得其所以是即寅亮天地也○弼予一人即所謂導之教訓傳之德義保其身體也



上文三公不言者以論道中足以包之也。○道化與陰陽天地非有異義。莊子注曰：天道陰陽運行則為化，自無而有，自有而無，則為化。此皆一陰一陽之妙，而天地之所以為天地者也。聖人有以參贊之，設官以論其道，弘其化，則陰陽和，天地位，其寔論道者，非不弘化弘化者，非不論道而變理。陰陽與寅亮天地，又非二事也，所以見公論于前，孤弼于後，其道相成，而非有二。爾三公言官不必備，惟其人則三，孤亦然。三孤言弼予一人，則三公可知。

# 冢宰掌邦治統百官均四海

集傳冢大宰治也。天官卿治官之長，是謂冢宰內統百官外均四海。蓋天子之相也，百官異職，管攝使歸。

于一是之謂統四海異宜調劑使得其平是之謂均

集說

孔氏穎達曰此經言六卿所掌之事周禮云乃立天官冢宰使帥其屬而掌邦治治官之屬大

宰卿

一人鄭玄云百官總焉則謂之冢列職于王則

稱大是冢大異名之意○蘇氏軾曰政教禮刑無所

不掌謂之邦治而百官總已以聽焉故冢宰為天官

必三公兼之餘卿或兼或特命○林氏之奇曰曾博

士曰先王建官分治未嘗不以正名為先名既正矣

然後分職以聽于上而事各有所係焉自冢宰以至

司空則所正之名也自掌邦治以至掌邦土則所分

之職也自統百官以至時地利則事各有所係也此

說是也然冢宰之職雖與六卿分掌有司之事然不

若司徒而下但掌一事而已蓋冢宰為六卿之首故

凡有司之事又冢宰總之也○董氏琮曰周禮大宰

掌建邦之六典一曰治典二曰教典三曰禮典四曰

政典五曰刑典六曰事典六典大宰兼掌此言掌邦  
治者教禮政刑之屬莫非治也○呂氏祖謙曰三公  
三孤天子所與調精祿之原而無所治者也統萬事  
而分治之則六卿之職六卿者萬事之綱也冢宰管  
攝百官非官官而控制之自百而歸六自六而歸一  
所操至簡也所調劑者非人人而稱量之也大與之  
為大小與之為小所居至易也明乎簡易之道相業  
無餘蘊矣○陳氏雅言曰百官異職而能統之則有  
倫有要有綱有紀咸得其序矣四海異宜而能均之  
則或遠或近或多或寡咸得其正矣此訓迪其職也  
○傅氏元初曰朱子言天子至尊其嬪御侍衛飲食  
衣服貨賄之官皆領于冢宰然則大宰所統之官盖  
官中府中俱為一體而  
四海之無難均可知矣

# 司徒掌邦教敷五典擾兆民

集傳擾馴也地官卿主國教化敷君臣父子夫婦長  
幼朋友五者之教以馴擾兆民之不順者而使之順  
也陳氏櫟曰順其自然而導之即舜典在寬之意唐虞司徒之官固已職掌  
如此

集說孔氏穎達曰周禮云乃立地官司徒使帥其屬而掌邦教以佐王安擾邦國大宰職云二曰教  
典以擾萬民五典即五教也布五常之教以安和天  
下之人民使小大協睦也周禮司徒十有二教分五  
教為之五教可以常行謂之五典也○王氏安石曰  
善教者決于民心而耳目無聞焉以道擾民者也不  
善教者施于民之耳目而求決于心以道強民者也  
擾之為言猶山藪之擾毛羽川澤之擾鱗介也自然

而然豈有制哉強之為言其猶囿毛羽治鱗介乎一失其制脫然逝矣○陳氏大猷曰司徒掌養民教民之事今獨言教取其重者言之猶宗伯掌禮樂而獨言掌邦禮也

## 宗伯掌邦禮治神人和上下

集傳春官卿主邦禮治天神地祇人鬼之事和上下尊卑等列春官於四時之序為長故其官謂之宗伯成周合樂於禮官謂之和者蓋以樂而言也

集說

孔氏穎達曰周禮云乃立春官宗伯使帥其屬而掌邦禮以佐王和邦國宗伯宗廟官之長其

職云掌建邦之天神人鬼地祇之禮又主吉凶賓軍嘉之五禮吉禮之別十有二凶禮之別有五賓禮之

別有八軍禮之別有五嘉禮之別有六總有三十六禮皆在宗伯職掌之文大宰職云三曰禮典以和邦國以諧萬民○金氏履祥曰宗伯不言司蓋所掌者禮禮莫重于祭祭莫切于宗廟不敢言司尊宗廟且崇禮也上下者尊卑貴賤之等儀和則不僭不逼各安其分有序則和也○陳氏櫟曰秩宗典天神地祇人鬼之三禮及國之吉凶軍賓嘉五禮以和上下尊卑等列是宗伯所掌乃三禮與五禮也禮所以辨上下定民志上下辨民志定則和矣和有樂之意○呂氏桷曰治神人和上下者治以禮言和以樂言皆兼幽明而舉之也與司徒之教不亦複乎蓋相目而成也

# 司馬掌邦政統六師平邦國

集傳夏官卿主戎馬之事掌國征伐統御六軍平治

邦國平謂強不得陵弱衆不得暴寡而人皆得其平也軍政莫急於馬故以司馬名官何莫非政獨戎政謂之政者用以征伐而正彼之不正王政之大者也

集說

孔氏穎達曰周禮云乃立夏官司馬使帥其屬而掌邦政以佐王平邦國其職主戎馬之事天

子六軍軍師之通名也其職掌九伐之法○呂氏祖謙曰政官之長是為司馬自夏后氏命胤侯掌六師舉政典以誓衆則邦政之掌于司馬舊矣天下無事寓兵于農然後賦役百為始有所施是固政之所從出也天下有事舉兵討亂邦之存亡安危繫焉其為政之大又不待論矣此戎政所以獨謂之政也統六師而謂之平邦國則王者用師之本旨特欲平邦國之不平者耳非有他求也○申氏時行曰六師者六

鄉六遂之師平居聚衆則蒐苗獮狩咸屬其教閱有事出征則伍兩卒旅咸屬其指麾由是奉行九伐之法以除天下之殘賊肅將四征之威以靖天下之禍亂使強暴者不得肆弱寡者賴以安所謂平邦國也

司寇掌邦禁詰姦慝刑暴亂

集傳秋官卿主寇賊法禁羣行政劫曰寇詰姦慝刑彊暴作亂者掌刑不曰刑而曰禁者禁於未然也呂氏曰姦慝隱而難知故謂之詰推鞠窮詰而求其情也暴亂顯而易見直刑之而已

集說

孔氏穎達曰周禮云乃立秋官司寇使帥其屬而掌邦禁以佐王刑邦國其職云刑邦國詰四



方馬融云詰猶窮也窮四方之奸也夏官主征伐秋官主刑殺征伐亦殺人而官屬異時者夏司馬討惡助夏時之長物秋司寇刑奸順秋時之殺物也○陳氏經曰刑曰邦禁此初設刑美意禁民使不為惡而非以虐民也虞禮樂分二官周合為一虞以士魚兵周分為二帝世詳于化而畧于政王世詳于政而畧于化世道升降之異也○陳氏大猷曰姦慝乃暴亂之本隱而難知故窮詰其情也暴亂乃姦慝之著已見所犯故加刑也要之詰而後刑刑者必詰互文也

# 司空掌邦土居四民時地利

集傳冬官卿主國空土

王氏樵曰空土者九土之曠田之未授者也

以居

士農工商四民順天時以興地利案周禮冬官則記

考工之事與此不同蓋本闕冬官漢儒以考工記當之也

集說

孔氏穎達曰周禮冬官亡小宰職云冬官掌邦事禮記王制記司空之事云量地以制邑度地

以居民足明冬官有主土居民之事齊語云管仲制法令士農工商四民不雜即此居民也周禮云事此云土者為下有居四民故云土以居民為急故也○林氏之奇曰司空者考工記曰國有六職百工居一焉鄭氏曰百工司空事官之屬司空掌營城郭建都邑立社稷宗廟車服器械監百工者以此觀之則名曰司空者亦其一事也○黃氏度曰凡居于王土者必有職有土則各以時致其利故工之飭材成此利也賈之阜貨通此利也皆土物也皆邦事也蓋無有不作而食者○呂氏祖謙曰地利者陂澤之灌溉土

壤之膏腴皆是也不曰興利而曰時地利者江河之徙移固有昔瘠而今沃者陵谷之遷變固有昔下而今高者隨時而權其興廢然後地利可盡焉○陳氏大猷曰為治莫先于教化故冢宰之後司徒次之教化莫先于禮樂故宗伯次之教之和之而猶有不率者則大者加以甲兵小者加以刑罰不得已也故司馬司寇次之暴亂去而後民得安居故以司空之居民終焉○金氏履祥曰司空掌空土之官也分畫空土以待臣之受封士之受祿農之受田工之受肆賈之受廛也凡土之未授者司空主之既授則屬之司徒司馬

六卿分職各率其屬以倡九牧阜成兆民

集傳六卿分職各率其屬官以倡九州之牧自內達

之於外政治明教化洽兆民之衆莫不阜厚而化成也案周禮每卿六十屬六卿三百六十屬也呂氏曰冢宰相天子統百官則司徒以下無非冢宰所統乃均列一職而併數之為六者網在綱中也乾坤之與六子並列于八方冢宰之於五卿並列于六職也

集說

林氏之奇曰程氏曰古之時分職主察天時以正四時遂居其方之官主其時之政在堯謂之

四岳于周乃六卿之任統天下之治者也蓋周之六卿本于羲和四子羲和四子分主四時之政周則不然矣然本自準四子而為之故以六卿之故加天地二字而曰天官地官春官夏官秋官冬官也蓋雖不

主四時之政而其名猶有唐虞之遺意。○呂氏祖謙曰六卿倡九牧自內而達之外九牧各率其州之諸侯以應六卿之令自外而受之于內內倡外應周浹泰和此成周治天下之體統也。○陳氏櫟曰周以六卿倡九牧猶唐虞以揆岳統牧伯故阜成之效不減和寧泰和在唐虞成周豈非以治天下之綱紀立而體統定歟

六年五服一朝又六年王乃時巡考制度于四岳諸侯各朝于方岳大明黜陟

集傳五服侯甸男采衛也六年一朝會京師十二年王一巡狩時巡者猶舜之四仲巡狩也考制度者猶

舜之協時月正日同律度量衡等事也

陳氏師凱曰大行人云王

之所以撫邦國諸侯者歲徧存三歲徧頌五歲徧省七歲屬象胥諭言語協辭命九歲屬瞽史諭書名聽聲音十有一歲達瑞節同度量成牢禮同數器修法則十有二歲王巡狩殷國案此則制度已預飭于前至巡狩諸侯各朝方岳者猶舜之肆覲東后也大明

黜陟者猶舜之黜陟幽明也疏數異時繁簡異制帝

王之治因時損益者可見矣

集說

林氏之奇曰此篇所載六卿與周禮同惟六年五服一朝與周禮異此言五服而大行人所言

者六服則其事不同尤可以見也又六年王乃時巡者十有二年也考制度朝方岳明黜陟皆斟酌舜之

事而行之惟五年之與十二年異耳案文中子叔恬問曰舜一歲而巡四岳國不費而民不勞何也曰兵衛少而徵求寡也周之時兵衛日多徵求日衆故不能五年而以十二年也○呂氏祖謙曰六卿倡九牧既立為治之綱矣繼以朝覲巡狩之制所以振其綱也卿牧倡和固有體統然多歷年歲非時有以振之豈無壅滯而不達乎六年一朝所以達其壅也豈無廢壞而不修乎又六年王時巡至大明黜陟所以修其廢也諸侯既親承德意于天子天子復親考制度于諸侯禮樂刑政斯四達而不悖矣

### 附錄

孔氏穎達曰周禮大行人云侯服歲一見其貢  
祀物甸服二歲一見其貢  
男服三歲一見其貢

其貢器物采服四歲一見其貢  
服物衛服五歲一見其貢  
材物要服六歲一見其貢  
貨物必如所言則周之諸侯各以服數來朝無六年一朝之事昭十三年左傳叔向云明王之制使諸侯歲聘以志業閒朝以

講禮再朝而會以示威再會而盟以顯昭明自古以來未之或失也說左傳者以為三年一朝六年一會十二年而盟事與周禮不同謂之前代明王之法先儒未嘗措意不知異之何由計彼六年一會與此六年五服一朝事相當也再會而盟與此十二年王乃時巡諸侯各朝于方岳亦相當也叔向盛陳此法以懼齊人使盟若周無此禮叔向妄說齊人當以辭拒之何敬以從命乎且云自古以來未之或失則當時猶尚行之不得為前代之法脅當時之人明矣大行人所云見者何必皆是君自朝乎遣使貢物亦應可矣大宗伯云時見曰會殷見曰同時見殷見不云年限時見曰會何必不是再朝而會乎殷見曰同何必不是再會而盟乎計六年大集應六服俱來而此文惟言五服孔以五服為侯甸男采衛蓋以要服路遠不必常能及期故寬言之而不數也



案六年五服一朝漢孔氏注五服侯甸男采衛六年一朝會京師蔡傳從之唐孔氏疏既據周禮一歲一見二歲一見之文則是六服諸侯各以服數來朝無六年一朝之事又引左傳叔向所云歲聘間朝再朝而會以為計彼六年一會與此六年五服一朝事適相合此以左傳揣度周官而曲通其說也宋元諸儒只信周禮六年各以服數來朝而謂周官言五服不言六服者或要服遠不必如期而至耳蔡傳則疑周禮與周官不合故附著其說于此

王曰嗚呼凡我有官君子欽乃攸司慎乃出令令出惟行弗惟反以公滅私民其允懷

集傳建官之體統前章既訓迪之矣此則居守官職

者咸在曰凡有官君子者合尊卑小大而同訓之也  
反者令出不可行而壅逆之謂言敬汝所主之職謹  
汝所出之令令出欲其行不欲其壅逆而不行也以  
天下之公理滅一己之私情則令行而民莫不敬信  
懷服矣

集說

程子曰公則一致私則萬殊人心不同如面只是私心○呂氏祖謙曰令出于君今戒凡有官

君子而謂之謹乃出令蓋令之大者固無異統而百司庶府自下條教於其屬亦何莫非令隨其輕重皆有休戚固不可易也○民之從違視公私之消長私意寢克則民懷寢深至于允懷則心誠懷之無有餘

蘊非以公盡滅其私者不能也上盡其公則下盡其情也不曰至公無私而曰以公滅私者蓋私者古今在官者之寔病故成王示之消長之理使知所用力也○陳氏經曰令未出而致謹可也既出則有行無反矣不謹于未令之先必反于既令之後何以示信乎○陳氏櫟曰滅私者純乎天理而私欲淨盡之謂欲民之允懷非以公盡滅其私者不可允懷誠服之謂也○王氏樵曰易渙汗其大號謂如汗之出而不反也以公滅私令之慎也民其允懷令之行也

學古入官議事以制政乃不迷其爾典常作之師無以利口亂厥官蓄疑敗謀怠忽荒政不學牆面莅事惟煩集傳學古學前代之法也制裁度也迷錯繆也典常

當代之法也周家典常皆文武周公之所講畫至精  
至備凡莅官者謹師之而已不可喋喋利口更改而  
紛亂之也積疑不決必敗其謀怠惰忽略必荒其政  
人而不學其猶正牆面而立必無所見而舉錯煩擾  
也○蘇氏曰鄭子產鑄刑書晉叔向譏之曰昔先王  
議事以制不為刑辟其言蓋取諸此先王人法並任  
而任人為多故律設大法而已其輕重之詳則付之  
人臨事而議以制其出入故刑簡而政清自唐以前

治罪科條止於今律令而已人之所犯日變無窮而律令有限以有限治無窮不聞有所闕豈非人法無行吏猶得臨事而議乎今律令之外科條數萬而不足於用有司請立新法者日益不已嗚呼任法之弊一至於此哉

集說

王氏炎曰議事以古義裁之故曰以制。呂氏祖謙曰議事斷之以制制即前日所學之成法

也。○有疑即辨可否立決蓄而不辨一前却謀所以不成也。急失之不及忽失之過荒其政均也。既歷數莅官之病復勉之以學之不可已學者應事以理雖萬變而不勞不學者應事以才不通于理觸事面

牆始猶以才力營之事漸多則不勝其煩矣。○陳氏  
標曰學古而後入官則謀事必能以古制裁酌之然  
世亦有好古而至于好異者故又欲其以典常之理  
為師也不學則于理不明惟見其煩擾而已學不學  
之得失相去如此。○王氏充耘曰無以利口亂厥官  
猶云罔以側言改厥度罔以辯言亂舊政皆為輕信  
他人之言耳。○陳氏雅言曰前代之法者堯舜禹湯  
之所垂訓其法固善然有宜于古而不宜于今者故  
學之于入官之先而議之于制事之際則事得其宜  
而無或有迷繆矣當代之法者文武周公之所講畫  
皆宜于今而不戾于古者故為典常而不可易但當  
謹師而不可亂則事皆有所守而不至或輕改矣。○  
湯氏顯祖曰學所以大蓄識而果德行者也蓄疑怠  
忽而不學則雖有古不知所以制雖有常不知所以  
師于政事之  
理猶面牆也

戒爾卿士功崇惟志業廣惟勤惟克果斷乃罔後艱

集傳此下申戒卿士也王氏曰功以志崇業以勤廣斷以勇克此三者天下之達道也呂氏曰功者業之成也業者功之積也崇其功者存乎志廣其業者存乎勤勤由志而生志待勤而遂雖有二者當幾而不能果斷則志與勤虛用而終蹈後艱矣

集說

林氏之奇曰洪範卿士惟月隱三年左傳曰鄭武公莊公為平王卿士注曰王卿之執政者則

卿士大臣也王氏曰卿士職業異于士大夫故別為之戒○志所以極高明故致其志者功之所以崇勤

所以致廣大故盡其勤者業之所以廣蓋無志則所期者卑陋而已何自而崇乎不勤則所成者淺近而已何自而廣乎○朱子曰斷以不疑鬼神避之需者事之賊也○陳氏大猷曰事之所成為功職之所務為業如士業于學學問思辨皆學業至于道充德備則學之功成矣農業於田播耨耘耔皆農業至收穫有秋則農功成矣功之高卑由立志之高下欲功之高立志固貴乎高然必勤以廣業則職業日勉日高其基立而其成高也否則事業以怠惰而狹小如築臺然安有基狹而臺高者雖有此志終不遂矣○陳氏櫟曰功崇至後艱四句乃申言蓄疑敗謀怠忽荒政之意而加警策耳功崇惟志業廣惟勤怠忽荒政之反也惟克果斷乃罔後艱蓄疑敗謀之反也○王氏克耘曰所謂後艱者非後患乃艱難而不易耳蓋天下之事乘其幾而為之則易為力後其時而為之則難為功



位不期驕祿不期侈恭儉惟德無載爾偽作德心逸日  
休作偽心勞日拙

集傳貴不與驕期而驕自至祿不與侈期而侈自至  
故居是位當知所以恭饗是祿當知所以儉然恭儉  
豈可以聲音笑貌為哉當有寔得於己不可從事於  
偽作德則中外惟一故心逸而日休休焉作偽則揜  
護不暇故心勞而日著其拙矣或曰期待也位所以  
崇德非期於為驕祿所以報功非期於為侈亦通

集說

呂氏祖謙曰居移氣養移體位祿之移養入于

驕侈而不自知處此而欲恭儉必定有是德不

容毫髮之偽然後可也天下之至逸而無憂者莫如

德天下之至勞而無益者莫如偽使作偽者共知勞

而無益亦何苦為此乎○陳氏經曰制驕莫如恭制

侈莫如儉寔有得于恭儉則為德以聲音笑貌為之

則偽矣恭儉出于德者逸而休恭儉出于偽者勞而

拙○孫氏繼有曰位高則氣盈氣盈則必驕祿厚則

用廣用廣則必侈恭儉驕侈念不並立故必恭儉然

後可以制驕侈但恭儉一也以恭儉之心發之為恭

儉則為德以驕侈之心

文之以恭儉則為偽

居寵思危罔不惟畏弗畏入畏

集傳居寵盛則思危辱當無所不致其祇畏苟不知

祇畏則入于可畏之中矣後之患失者與思危相似然思危者以寵利為憂患失者以寵利為樂所存大不同也

集說

林氏之奇曰易曰亡者保其存者也亂者有其治者也蓋自以為為存者必至于亡自以為為治者

必至于亂故自以為不足畏者必至于可畏觀魯季孫自以為亡無日君子曰知懼如是斯不亡矣正此之謂○陳氏櫟曰居寵之寵即指祿位言利祿與危辱為鄰甚可畏也思其危則畏懼不暇何敢驕侈乎○申氏時行曰上二畏字以兢業之心言末一畏字以危辱之禍言

推賢讓能庶官乃和不和政厯舉能其官惟爾之能稱

匪其人惟爾不任

集傳賢有德者也能有才者也王氏曰道二義利而已推賢讓能所以為義大臣出於義則莫不出於義此庶官所以不爭而和蔽賢害能所以為利大臣出於利則莫不出於利此庶官所以爭而不和庶官不和則政必雜亂而不理矣稱亦舉也所舉之人能修其官是亦爾之所能舉非其人是亦爾不勝任古者大臣以人事君其責如此

集說

陳氏經曰人能推讓樂善故也不能推讓忌嫉故也九官相讓衆賢和朝范宣子讓其下皆讓

安有不和者我忌嫉人人必忌嫉我交相忌嫉何有

于和○董氏鼎曰因所稱舉之賢否益足以見我之

賢否則推人之賢乃我之賢也讓人之能乃我之能

也為人臣者以是觀之必無妬賢嫉能之事賢者有

所勸而不肖者亦可以自警矣○邱氏濬曰有虞之

朝禹遜之稷契皋陶垂遜之及桀伯與益遜朱虎熊

羆伯夷遜夔龍蓋君以其人為賢能而用之而其人

不自賢不自能而推之賢讓之能其相與如此此百

官和于朝而庶績所以咸熙也歟成王仰惟唐虞建

官之意而時若之而以推賢讓能望其臣蓋欲其效

虞廷之九官濟濟相讓也○申氏時行曰庶官是六

卿之屬賢能凡有才德者皆是賢不必其出于已而

惟賢是推能不必其出于已而惟能是讓此至公之

心大臣之義也庶官和則是觀感其推讓之義而師

師濟濟無忌克無乖爭也。不和政厖是大臣出于私而庶官化之舉能其官以下言大臣薦舉之公私不惟係庶官之和與不和而亦係臣職之盡與不盡不可不慎也。

王曰嗚呼三事暨大夫敬爾有官亂爾有政以佑乃辟永康兆民萬邦惟無斁。

集傳三事即立政三事也。

王氏樵曰三事以為即立政三事者成周雖分六官

其職則仍古三事之職也

亂治也篇終歎息上自三事下至大夫

而申戒勅之也其不及公孤者公孤德尊位隆非有待於戒勅也。

集說

呂氏祖謙曰訓戒既終復提要總告之各敬爾官以治爾政即前所謂欽乃攸司也統而言之

惟在于輔君以永安民耳○陳氏大猷曰前言阜成兆民指當時言此言永康兆民期于永久也○董氏鼎曰唐虞建官庶政和萬國寧我周建官庶政之和亦若是則我周萬國之寧者其有猷數乎此成王歸于宗周不暇他及而汲汲于董正治官以國家紀綱所係根本所關至不輕也○申氏時行曰三事即六卿大夫即六卿之屬蓋六卿所主即子民理事守法之任也官以位言即卿屬政以職言即政治教化官必有政而亂政即所以敬其官也以佑二句謂以此輔君永康其民也萬邦惟無斁言被其阜成之澤者永有尊親之心而無厭斁矣


總論

呂氏祖謙曰金縢成王初年之書也洛告周公還政之書也無逸立政周公教戒成王之書也

周官成王親政開物成務之書也合是數篇以觀成王可以見其本質焉可以見其昏明疑信之變焉可以見其講貫啟發之深焉可以見其知類通達離師傳而不反焉成王進德之序備矣周公格君之功著矣○陳氏經曰周官立政之效也二篇大率相為表裏周公作立政告成王王能推行之考此篇如撫萬邦征弗庭即詰戎兵行天下之意也立大師傳保以下即用三宅之意也戒百官以典常作師即克用常人之意也成王尊所聞行所知如此其高明光大宜哉

欽定書經傳說彙纂卷十八





覆校官檢討臣陳夢元

校對官編修臣張秉愚

謄錄監生臣孔廣材